



Qanoq ililluta nunatta iluani timersornikkut pitsanngorsaallutalu ineriartortitseqqissinnaanerput pillugu apeqqutaat aallaavigalugu oqallinnissamik siunnersuut? Nunatta nunanut allanut unammisartoqarnerup tungaatigut inerisaajumalluta timersoqatigiiffiit nunatsinni pissartanngorniuttarnerit avataatigut nunatta iluani unammisaqattaartarnerat akulikinnerulersinneqassappat taava qanoq iliuseqartariaqarpugut?

(Inatsisartunut ilaasortaqaq Peter Olsen, Inuit Ataqtigiit)

Timersorneq timersornerullu iluaqutai pitsaaqutaalu isiginiarneqanngippallaaqaat. Inuiaqatigiittut nunatullu amerlasuut pikkorinnerillu timersornerannut aningaasat ikippallaat atortarpagut.

Timersorneq inuummaritsitsisarpoq, peqqinnarpoq aamma inuulluataarnerup nassataanik nappaatinik pinngitsoortitsisarpoq aammali ataatsimoortitsisarpoq, unammisartoqatigiinnik ataqtigiissitsisarpoq, tunniusimatitsisarpoq, angusassamik toraagaqartitsisarpoq aamma malinnaalluatitsisarpoq.

Tamakku tamaasa uani saqqummiussanni itisilissavakka.

Siullermik erseqqissartariaqarpara, amerlassut pikkorinnerillu timersornerat ataqtigiimmat. Uanga paasinnittaasera naapertorlugu kukkuneruvoq sumiiffinni amerlasuuni assortuussutigineqartarmat amerlasuut timersornissaat pingaartinneqarnerussanersoq imaluunniit pikkorinnerit timersornissaat. Uanga paasinnittaasera naapertorlugu amerlasuut pikkorinnerillu imminnut ataqtigiippup. Sualummik meeqqat inuusuttullu nuannaartorisaaqarnissaminnut pisariaqartitsippup - assersuuffigisinnaasaminnik. Qularutissaanngilaq timersuutit ilaasa nuannarineqarnerat qaffattarmat appartarlunilu, apeqqutaalluni kina nuannaartorineqarnerasoq aamma nuannaartorisat allanut unamminerminni qanoq ingerlasarnerut.

Tamanna tunngavigalugu pingaaruteqarpoq amerlasuut pikkorinnerillu ataatsikkut eqqarsaatiginissaat timersorneq pineqartillugu. Uani oqallinnissamut saqqummiussami siunnersuuteqartup oqaatigaa qanoq iliorluta unammersuarnerit amerlanerit nunatsinni pitissinnaanerigut. Akissut paasiuminartoq eqqortorlu tassaavoq pitsaasunik illunik peqassasugut. Iluqaataanngilaq unammisarfiit timersortarfiillu neqeroorutigisinnaasagut aserfallassimappata qanganitserlutillu. Taamaattumik pilersaarusiortariaqarpugut sumi, qaqugu qanorlu timersortarfinnik nutaalianik pilerinartunillu sanaartussanerluta. Tassunga atatillugu



pingaaruteqarpoq eqqaamassallugu taakku sanaartorneqarnissaat amerlasuut pikkorinnerillu iluaquserumallugit. Eqqaassutissarsuarnik sanaartussanngilagut napaannarlutik aserfallakkiartortussanik. Taamaattumik aamma pilersaarusiortariaqarparput sanaartukkat aserfallattaalineqartarnissaat.

Ukiut arfineq-pingasut missaat qaanngiuttut Inatsisartunut ilaasortanngoqqaarama siunnersuuteqarpunga arsaattarfinnik ivingaasanik qallikkanik sanaartortariaqartugut. Tamanna taamani Inatsisartuni ilalerneqartorsuunngilaq aamma siunnersuutiga kinguneqanngitsoorpoq. Ukioq manna 2018-mi ivingaasanik qallikkanik arsaattarfittaartornikuuvugut sumiiffinni amerlasuuni ullumikkullu arlaannattaluunniit atunngitsoorsinnaajunnaarnikuuaat? Taamaagunavippoq. Arsaattarfiit ivingaasanik qallikkat eqqaani aalaaluttoqartuarpoq nuannaartunik aamma taamaasilluni qularnaarneqartarpoq aalasarnissarput pitsaasumik nuannersumillu. Aamma taamatut pitsanngorsassavagut timersortarfiutigit, pilerinarsarlugit kikkunnet tamanut.

Aperineqassaqqooqaanga, timersornermut tunngatillugu eqqartungarpassuakka qanoq aningaasalersorniarnikka. Akissutissara ersarissaq tassaavoq timersorneq aningaasaliiffittut isigissagipput, piffissaq sivilunerusoq isigalugu imminut akilertussatut. Qanorluunniit ukioqaraluartut timersortarnissaat eqqarsaatigalugu pigutta piffissap ingerlanerani inuulluataarnerup nassatai nappaatit millisissavagut aamma napparsimaneq pissutigalugu sulinnngitsoortarnerit, tamannalu inuiaqatigiit aningaasarsiornerannut mikinnngitsumik iluaqusiisussaavoq. Allannngortinneqarsinnaanngilarli timersornermut massakkorpiaq aningaasaliisariaqaleratta taamaattumik oqaannassaanga, Demokraatinut immikkoortoq pingaaruteqarluinnarmat sallinnngortittariaqarmallu. Tassa imaappoq immikkoortut ilaanni sipaaruteqarnikkut timersorneq siuarsarniarlugu aningaasat nassaarinissaannut piareersimavugut.

Tamatuma saniatigit puigorneqartartoq tassaavoq timersorneq piginnaanngortitsisarmat sulinermi misilerarneqartartumik. Anguniagassinnissaq ilikkarneqartarpoq sungiusartoqartarlunilu timaliiniarluni angusassamik toraangaqarluni. Ilinniarneqartarpoq tunniusimanissap pingaassusaa - pikkorissunngorniaranni sungiusarneq aalluttariaqarpoq paaralugulu. Piginnaanerit taamaattut sulinermi pisariaqartippagut tamakkulu atuarlugit ilinniarneqarsinnaanngillat. Tamanna timersornermut ilaavoq pingaaruteqarluni.

Taavalu erseqqissarusuppara timersorneq ataqatigiilersitsisarmat. Uangut atisaajartarfimmiinnikuusut nalunngilarput suna pinerlugu.

Tamanna tunngavigalugu qularutigineqassanngilaq Demokraatini piareersimagatta timersornermut aningaasaliinissatsinnut. Siunnersuuteqartup eqqaavai 3,5 millioner koruunit. Uanga taamatut naatsorsuerusunngilanga.

Piffissaq ungasinnerusoq isigalugu pilersaarusioqataarusuppunga qularnaarumallugu timersornerup kalaallit tamarmik ulluannut ilaalernissaa apeqqutaatinnagu pikkorinnerpaanut timersornerunersoq



imaluunniit ilungersuuterujussuannikkaluarlugu timersornerunersoq. Qanoq akeqassanersoq piffissap takutikkumaarpaa, kisianni soorlu nassuiareeringa, aningaasaliissutit tamarluinnaqqissaamik utissaqqaarput saqqummiussanilu oqareernittut assigiinngitsunik iluaqusiilluni.

Oqallinnerup sinnera qilanaarlunga peqataaffigissavara.